

洞玄靈寶无量度人經訣音義

張萬福集

凡持太上洞玄靈寶无量十部事經東向前三禮北而立左轉東向叩齒三十六通思五色雲氣覆滿一室青龍白虎師子玄武朱雀鳳凰備守前後玉女仙童五帝神官神仙兵馬尤億萬衆營衛左右便搖身三過而誦經竟當從南面下牀禮如初

右出金錄簡文經

凡開靈經誦經之時皆當燒香整具法服禮經如法誦呪曰

寂寂至无宗 虛峙劫刃阿 豁落洞玄文 誰測此幽遐 一入大乘路 孰計年劫多 不生亦不滅 欲生因蓮華 超凌三界徒 慈心解世羅 真人无上德 世世為仙家

右出太極寶訣

太上洞玄靈寶无量度人上品妙經者斯乃人法雙舉總別俱含太上一代之法王道君宣經之化主洞玄靈寶是十部之總題无量度人為一軸之別目太者極大之嘉名上者

窮高之美稱窮高則居上无頂極大則物莫能過欲明聖人體貴德專窮理盡妙轉迴靡測難可思議故云太上洞者虛通不滯豁達无為覺清遠顯暢遐徹玄者冲微遠妙寂湛然理致杳冥幽原眇邈靈者精用朗淨智照圓明將應變盡性之宜實慧周萬機之境寶者珍奇挺秀尊貴如榮布象則天地成形貸烝則含生化育无量度人者无是不有之目量是數極之名度以濟彼為言人以物類成稱斯乃濟度天人極无數量凡厥昇進俱入妙門成就有心使歸无相上品妙經者此經始於无始最為先說眾品之內標之上元宗常湛故曰妙經尋斯旨趣義含无量就明无量自有五意一者體无量二者德无量三者威无量四者品无量五者音无量體无量者但天尊宗源久遠本自難知或真應兩身權實二智是以託名龍漢即曰无形設號開皇乃稱元始隨機設教逐病與藥周應不窮无乎不在此第一體无量也德无量者體處元陽怡神靜漠口含五色光照大千能

使受法珠中間經太上此第二德无量也威无量者聖人懷藏日月推定陰陽迴山駐流調和烝序千千截首制伏妖魔萬萬窮形邪不擾正此第三威无量也品无量者若論凡物皆有品第即有高下少多之目今明聖人應物隨緣非高非下赴機遂便不少不多難可以高下格量无能以少多所得是以无品品则无量此第四品无量也音无量者明聖人以无言之說則不窮无聲之響響則无絕使歷劫解悟人天曉聞故云大梵隱語无量之音又云天中之音斯之謂也此第五音无量也略陳梗槩其意云爾

右出洞元靈寶十部經序

四極明科曰凡誦經當令心目相應目无妄視心无異念每使披卷言句周竟不得中住越略天音三犯萬不得仙五犯已上死充地獄三塗五苦萬劫之中隱注曰讀經五百言則叩齒三下以舌舐上下脣咽液三過令人不極久而聲清不如此法損氣勞神也 右出洞玄靈寶齋內事心業序

人間多讀誦洞玄靈寶无量度人經雖有親想之訣而罕解節度今復具言庶可得知自題以下降元始正經既是道君敎贊宜依洞玄十部存念內音自須依本法今具列之如左讀至道言次依下文存思祝誦及甲乙若自為不宜云又為人不宜云臣心不兼二故也若為已及人宜依本文畢引炁三十二過須徐徐引取三十二天之炁然後依法誦之此正是元始无量度人存念法也

行道章叩齒三十二通上聞三十二天心拜三十二過須一一依口密誦天名心聞諸天一一心拜心拜形雖不動隨心屈伏如身禮也皆先習精熟知天所在无令臨事致疎遲迴不決凡存念祝誦悉皆如此也

太黃皇曾天 太明王完天 清明何童天
元胎平育天 元明文舉天 七曜摩夷天
虛无越衡天 太極濛翳天
右八天位係東方九炁青天從北頭為始南行也
赤明和陽天 元明恭華天 曜明宗飄天

炁落皇笏天 虛明堂曜天 觀明端靜天
元明恭慶天 太煥極瑤天
右八天位係南方三炁丹天從東頭起西行

元載孔昇天 太安皇崖天 顯定極風天
始皇孝芒天 太黃翁重天 无思江由天
上揲阮樂天 无極雲誓天
右八天位係西方七炁素天從南頭為始北行

皓庭霄度天 淵通元洞天 翰寵妙成天
秀樂禁上天 无上常融天 王隆騰勝天
龍變梵度天 平育賈奕天
右八天位係北方五炁玄天從西頭始東行

誦諸天內音存念法
東靈要六十四字存念法叩齒九通思九色之龍導引前後青雲九重覆匝身形呪曰
赤明開圖八炁迴真總統元關青帝大神流化九外纏綿我身靈音八書六十四篇洞明天地與我合仙運致龍駕上昇帝棘

呪畢引炁九咽止行之九年八天各以青腰玉女青華玉童各八人侍衛身形致青牙之精生身光明徹見虛无萬徧道成即得飛行七祖同福皆昇南宮也

南宮爛六十四字存念法叩齒三通思朱雀鳳凰翔翔其前絳雲三重覆匝身形密呪曰三炁徘徊靈鳳來飛玉音八字爛煥紫微吉日大慶我道洞開朱丹哺飴仰吸靈暉身生水火絳帔羽衣登空飛步足踐鳳梯周旋八天七祖相隨

呪畢引炁三咽止行之三年八天各以太丹玉女太陽玉童各八人侍衛身形降致朱丹三炁之精反白留容萬劫不傾七祖起昇上入福堂反胎王家即得更生
西刀利六十四字存念法叩齒七通思白虎師子導引左右素雲七重覆匝身形密呪曰七炁金靈八天尊神白虎策輦師子捧轅七炁纏綿鍊我成仙身登金光朕照素雲內外變化昇入洞門七祖出夜九幽旋寬億劫開度隨運長存

道言序太上道君為此經始青天中東土之浮

近跡隻傳烟艷詒詒云洗洗打首吹以以

洞玄靈寶无量度人經訣音義